

清史列傳

冊
五



清史列傳 卷五十四

大臣畫一傳檔後編十

布彥泰

布彥泰顏扎氏滿洲正黃旗人父珠爾杭阿鑲藍旗滿洲副都統嘉慶八年賞騎都尉世職布彥泰由廕生於十二年賞藍翎侍衛十二月襲職十三年陞三等侍衛二十三年授二等侍衛充伊犁領隊大臣道光二年擢頭等侍衛調喀什噶爾參贊大臣旋授辦事大臣三年回京當差四年充考試翰詹監試大臣五年四月在尙茶正行走六年復授伊犁領隊大臣八年賞副都統銜調烏什辦事大臣九年正月擢喀什噶爾總兵六月因病開缺十年閏四月賞副都統銜頭等侍衛在乾清門行走五月授哈密辦事大臣八月調西寧辦事大臣時伊犁邊外不靖將軍玉麟以布彥泰前曾兩任領隊大臣情形熟悉請調赴伊犁藉資助理詔如所請尋授伊犁參贊大臣十一年正月因浩罕在吹塔拉斯築城疏言吹塔拉斯在伊犁西南卡外恐逆匪據爲巢穴似宜及早查辦請敕揚威將軍長齡等於派兵

出卡捕拏逆匪之便順赴吹塔拉斯確切察勘如實有聚衆之事無難藉南路兵力使該處震懾軍威庶卡外邊內千餘里之地可期肅清旋擢鑲紅旗滿洲副都統是月疏陳新疆茶政及洋商貿易情形請酌復舊章從之十二年二月調塔爾巴哈臺參贊大臣七月疏言塔爾巴哈臺所屬巴爾魯克蒙古內之額魯特察哈爾哈薩克各部落請酌添佐領三員領催五名官兵五十名其巴爾魯克坐卡官兵祇領給本身口糧將伊犁換防蒙古官兵例支跟役口糧全行裁汰如所請行十三年十月調伊犁參贊大臣十一月以副將金和詳揭布彥泰辦理平糶前後不符經伊犁將軍特依順保查明入告得旨降四級留任十四年四月因病開缺回京十八年署正藍旗漢軍副都統旋陞察哈爾都統二十年三月擢伊犁將軍四月入覲命在御前行走五月赴將軍任二十一年二月授鑲黃旗蒙古都統二十二年疏陳開墾事宜略言惠遠城東三顆樹地方計可墾地三萬餘畝請就地民戶選擇安設種地輸糧阿勒卜斯地方計可墾地十七餘萬畝卽請責成阿奇木伯克等籌計戶口之數酌量勻撥諭曰民戶應如何選充授田回屯應如何安插移住以及籌備牛具籽種各事宜仍著該將軍飭令委員等趕爲布置二十

三年以天津添設總兵諭令體察新疆兵制情形可否裁改尋疏言查伊犁總兵駐紮綏定城係伊犁所轄八城之一不與將軍參贊同城近來卡外夷情與從前迥不相同設遇裁官減弁更必妄生揣測溷播謠言似與鎮靜邊防大有關係該鎮兵丁以耕種爲餬口俱各安土重遷勢難驟予裁移儻將總兵易爲將領若兵數仍舊則於營制不符兵數稍裁又與屯務有礙不敢遷就目前致貽後患惟天津旣須添設總兵自應於各鎮中量行裁改茲就西路一帶而論口外實難議撤惟陝西西安鎮總兵本係將軍標中軍副將嘉慶年間改爲總兵查陝西全省情形以南山爲最重見有漢中陝安二鎮重兵駐守北山臨邊一帶亦有延綏鎮足資控制其西安省會有將軍巡撫副都統駐紮滿營兵丁六千餘名撫標參將城守營參將各一員滿漢兵丁不下萬名大員不爲不多兵力不爲不厚且該鎮轄境俱在平原與其裁撤邊陲重鎮致費周章似不若議裁此缺移置天津較爲妥便應請敕下陝甘督臣富呢揚阿悉心籌議據實覆奏再查嘉峪關外共設總兵三員除伊犁鎮外一爲巴里坤鎮實缺總兵係乾隆二十七年由西安移駐一爲喀什噶爾換防總兵係道光八年以換防副將改設巴里坤界在哈密烏魯木齊

之中係屬腹地較之伊犁鎮情形輕重稍有不同喀什噶爾改設總兵原因彼時換防兵丁多至六千五百名是以必須改協爲鎮方資表率十餘年來防兵陸續裁減僅存三千五百名較之從前多寡懸殊若將該鎮仍改爲換防副將歸於該城領隊大臣統轄與體制邊防均有裨益即將該鎮換防總兵改爲巴里坤換防總兵在該鎮以額缺作爲換防體制無異即可騰出一缺移置天津亦尙簡易惟是新疆重地外人環列而居一切機宜總宜率由舊章方爲鎮定庶幾中外帖服歷久相安疏入下部議行十二月疏陳開墾地畝分安民戶回屯覈辦章程下部覈議二十四年二月疏報塔什圖畢等處開墾地畝疊著成效上嘉其忠誠爲國督率有方賞加太子太保銜仍交部優敘又以烏魯木齊未墾之地未據都統奏辦命布彥泰會同該都統惟勤體察情形派員確勘並詳查伊犁已開地畝外及各城地方如有曠地可以招墾一律奏辦尋疏言伊犁各城曠地向於操兵查馬之便留心相度並與文武員弁加意講求令其廣諮博訪如有可墾之地卽行呈報是以節次奏明辦理之案幸皆有成此外未經開墾者大抵窒礙多端不能確有把握緣新疆地多砂磧雨澤又稀專賴人力灌輸無論石磧鹹地不堪開墾卽

或土本膏腴而無水泉可引則亦不能耕種終致荒蕪見於未墾各荒地中不得已而思其次查惠遠城東六十餘里之阿齊烏蘇有廢地一區頗爲寬廣嘉慶八九年間經前任將軍松筠奏撥八旗閑散餘丁赴地耕種許以作爲己產未幾乏水接濟遂卽廢棄該旗人久經散去此項廢地已與舊派旗人無干其所以廢棄之故係因當時未開水利僅恃巴燕岱灌田之水暫行分溉其勢自難爲繼今欲重行墾復必將該地迤東各屯原用之水逐段開渠引而西下遞相轉輸其極東須引哈什河水方可用之不竭如此設法挹注則各屯田地皆可澆灌不致顧此失彼而阿齊烏蘇荒地亦得灌溉成田似可以垂久遠惟統計遞開渠道須繞越五百餘里其間橫崖斷澗土石參差卽使人力可勉而成而經費浩繁較前次各案開墾之資不啻數倍伊犁爲極邊僻壤瘠苦異常迥非內地勸捐可比臣雖倡率捐廉而一時未具規模不敢遽行入告茲疊奉宸謨指示益切服膺見委歷次總辦開墾之撫民同知慶辰印房章京塔那泰等前往勘估一面通盤籌畫俟立定章程卽當專摺奏辦儻該處實多格礙亦必設法另籌總期地利無遺獲收實效至前次開墾案內捐辦各員經吏部奏請敕查所捐銀數及所墾頃畝若干固

爲覈實起見惟查伊犁歷屆捐墾成案皆係收工而非收銀緣口外辦工與內地情形互異內地人員衆多每遇大工由總局彙收經費發交工員領用雇夫購料皆可專司卽工匠人等亦有行市總頭承領雇募故捐銀者不必經手工程若伊犁則管理地方者只有廳員巡檢在官人役亦屬無多若捐工之員交銀卽爲了事則辦理乏人是以所派工員不但捐資並皆出力始敢奏請鼓勵且墾田必以開渠爲第一要務其挑挖出土有力者皆當能之而築壩造橋安牖建屋則非土木工匠不能如式造成儻不各認各工各雇各匠卽恐互相觀望催促不前卽以挑工而論除回夫一項每夫照案發給鹽菜銀五分外其他民匠民夫雇資每增至數倍緣回夫有限當各員一體開工不能不於民人或遣犯中各自擇人議價而道里之遠近工力之優絀亦伸縮不齊故每日工價止能聽各員自行給發其督工監工之員但能覈計工數而銀錢非其經手無從查悉其詳臣赴工驗收亦惟覈其已辦工程作爲定準且各員尙有給予夫匠飯食製辦器具以及格外犒賞不一而足彼此相形之下踴躍爭先倍易刻期集事又如所捐木料樹株等項大小價值不同遠近運腳亦異與捐給之牛具籽種均難瑣屑覈開並因歷奉上

諭捐辦之工概免造冊報銷是以興工之初卽奏免造報奉旨允准今若事後仍令開造不惟記憶難周且恐經手丁胥倚恃工已驗收任意浮報徒煩駁飭竊惟辦工以工爲主計銀似不如計工之直捷亦不如計工之覈實所有前次用過夫匠五十三萬四千工業經於開墾完竣摺內奏明確數在案可否仍遵前奉諭旨免其造冊報銷至所墾頃畝之數查三棵樹紅柳灣共實得地三萬三千三百五十畝阿勒卜斯實得地十六萬一千餘畝亦經前次奏明在案但荒地之開墾成田由於渠工之空通水利故開渠雖各分工段而著效則一氣呵成似不能劃出某頃某畝爲某員所捐辦者此係工次實在情形不敢稍有隱飾如蒙聖慈俯鑒並乞恩免飭查疏入從之時上命布彥泰傳諭前兩廣總督林則徐前赴阿克蘇烏什和闐周勘可墾荒地並選派明白曉事之協領一員隨往勘視布彥泰以此次勘地須體察回疆一切情形何處可招戶民認種能否相安何處祇應撥給回子耕種有無流弊全在接情度勢務爲久遠良圖旗營協領各員識力未周職分較小疏留喀喇沙爾辦事大臣全慶暫緩更換與林則徐會同履勘允之二十五年四月英吉沙爾布魯特滋擾圖木舒克卡倫派兵擊走之九月疏報查勘新疆

開墾事務完竣得旨嘉獎十一月陞陝甘總督二十六年正月以伊犁新開渠水暢旺灌溉勻霑奏獎出力人員六月以黑錯寺番匪滋事派兵剿毀具疏以聞諭曰布彥泰奏官兵剿毀番匪所辦可嘉之至該處番族衆多素稱獷悍其膽敢出巢肆搶者歷有年所從前總督提鎮等辦理番案一味因循遷延敷衍了事以致該番等習爲故常肆行無忌此次黑錯寺番族恃強抗拒經該督等示以兵威添調官兵帶領進剿經過番莊隨燒隨進斃賊多名該匪皆奔竄逃命見經查拏餘匪緝捕漢奸酌量撤兵辦理安速布彥泰等調度有方均著交部優敘尋疏言黑錯寺敗匪竄匿果岔地方經官兵窮追搜捕業已殲擒殆盡見在拉布魯寺僧衆收合散還番族帶領來營匍匐乞命當爲嚴立條約准令悔過自新官兵卽日凱撤上嘉獎之先是英吉沙爾拏獲逆犯胡完解經布彥泰覆審供詞不符奏請提訊得旨交伊犁將軍薩迎阿覆審至是訊明胡完本名薩密斯項並非逆子布孜爾罕亦無從逆情事上以布彥泰首先平反冤獄交部優敘二十七年正月命查陝甘營務三月以保送甘肅學習期滿之雲騎尉泮魁箭射無準降一級留任六月復以保送陝西寧羌營年滿千總鄒步雲箭射無準下部議處八月馳奏喀什

噶爾卡外安集延布魯特糾約本地回子屯聚城外尋釁肆擾刻已咨會提督卽行帶兵出關一面帶兵親赴肅州策應奉諭安集延布魯特等回衆性類犬羊反覆靡定膽敢煽結近城回衆困踞城垣藐法已極必應速伸天討以靖逆萌布彥泰著授爲定西將軍軍務一切悉聽節制奕山著作爲參贊大臣襄辦軍務均著豫給關防其所需軍餉卽由陝西甘肅兩省藩庫支發該將軍等務宜激勵將弁除暴安良一切相機剿辦迅速蒞事俾根株盡絕邊圉肅清以副朕望九月以大兵獲勝二城解圍命仍回陝甘總督本任十月以軍務告竣請撤軍需局並請將見存銀二十八萬兩分撥新疆各城從之二十九年七月因病請假嗣病勢增劇籲請開缺許之時布彥泰爲固原州知州徐采鎮稟計上命協辦大學士戶部尚書祁寯藻會同陝甘總督琦善查辦三十年正月查明覆奏諭曰此案布彥泰雖查無贓私重情惟封疆大吏關防不密辦理清查致多歧誤並令屬員虛報到任任聽家人售賣衣物種種蠱率殊負委任著交部嚴加議處卽行回京聽候部議尋得旨布彥泰著照部議降四級調用任內本有革職留任之案著卽革職三月賞二等侍衛充葉爾羌幫辦大臣五月以前在陝甘總督任內派委人員不實降

二級留任十一月調伊犁參贊大臣咸豐元年六月以俄羅斯請赴伊犁會議通商上命將軍奕山與布彥泰熟籌具奏八月布彥泰等擬定章程奏入諭曰此次俄羅斯使臣來伊犁會議通商事宜該將軍參贊公同酌定條款內如卡外搶案中國不管及在內地竊案分別酌辦等情所議均屬周而並將喀什噶爾不准通商一層據理折辯該使臣無可置對給予文憑以爲回國銷差之據文內仍正色拒絕杜其日後請求辦理尙屬妥協見在該使臣已回本國所有伊犁塔爾巴哈臺二處貿易是否卽自明春試辦其辦理通商安插情形如何分別奏咨存案並內地商民如何稽查約束一切未盡事宜仍著該將軍等悉心妥議具奏單內第二條商人與外商交易彼此設官照管由營務處派員前往各自秉公辦理經此次議定後常時貿易全賴所派之員彈壓撫綏管照一切遇有爭鬪小事公同剖斷不至因小釀大邊防所繫最爲緊要必須遴委廉明公正之員通曉事理而不貪小利者方能辦理得宜彼此歷久相安免啟外人輕侮該將軍參贊及塔爾巴哈臺大臣遇派委時切宜加意慎重如何酌定年限輪替之處詳晰議奏另片奏會議將來有犯罪名一條儻遇人命重案卽照恰克圖見辦之例辦理措詞尙爲

得體至摺內所稱嗣後遇有殺傷俄羅斯人等犯均解往陝甘總督衙門訊辦等語甘肅相距遼遠若將人犯解往訊辦轉多未便應否仍由該將軍參贊等就近訊明定罪再行解往甘肅辦理之處一併詳議具奏十一月賞副都統銜先是上命奕山等將俄羅斯貿易章程再行妥議並國子監祭酒勝保奏宜思患豫防嚴定限制一併妥爲籌計至是布彥泰偕將軍奕山覆奏語詳奕山傳二年正月授正白旗漢軍副都統仍留伊犁參贊大臣任六月以夷匪鐵完庫里先後竄擾喀什噶爾烏什卡倫上命布彥泰馳赴葉爾羌確查七月復奉寄諭奕山等奏稱六月初九日又有逆裔倭里罕帶領布魯特賊匪自圖舒克塔什卡倫竄入經官兵追至巴爾昌卡倫逃出是該匪等仍在卡倫窺伺並未遠颺守卡官兵何以任其出入毫無抵禦著布彥泰仍遵前旨速赴葉爾羌逐細詳查相機妥辦並迅飭各城一體嚴防務期弭患未萌毋稍疏懈三年二月以捐銀一千兩交部議敘九月命回京當差四年正月到京旋奉諭前有旨令布彥泰馳赴王慶坨軍營因該員患病賞假著卽加緊醫治迅赴軍營毋稍遲緩旋以捐銀五千兩賞戴花翎復以病難速痊懇請開缺詔允之布彥泰先後在新疆呈進馬匹賞蟒服文綺等件凡

四次光緒六年五月卒遺疏入諭曰前任陝甘總督正白旗漢軍副都統布彥泰由嘉慶元年廕生藍翎侍衛歷陞喀什噶爾參贊大臣伊犁將軍陝甘總督宣力有年嗣因案革職旋補正白旗漢軍副都統於咸豐年間因病奏請開缺在旗養疴年屆九旬茲聞溘逝軫惜殊深著加恩照都統例賜卹任內一切處分悉予開復應得卹典該衙門察例具奏伊子候選主事松岫著俟百日孝滿後由該旗帶領引見以示篤念耆臣至意尋賜祭葬

覺羅樂斌

覺羅樂斌正黃旗人由印務參領於道光二十二年九月授正紅旗蒙古副都統十一月充烏里雅蘇臺參贊大臣二十六年回京署正藍旗滿洲副都統二十九年授盛京副都統咸豐元年擢烏魯木齊都統三年二月以倡捐軍餉下部優敘旋陞綏遠城將軍四月奏稱烏魯木齊刑名事件日繁請添設印房委署章京一缺如所請行八月調成都將軍四年五月復因捐助軍需下部議敘九月兼署四川總督五年新津縣匪徒滋事逃入蒲江知縣韓一松督捕遇害匪益熾遂撲縣城樂斌檄官軍討平之旋即署總督任時馬邊廳夷匪滋事於沿山漢地搭蓋夷

棚樂斌會同總督黃宗漢調集兵團進剿殲匪千餘毀夷棚二千餘間匪首就戮各夷悉降六年六月復以捐助軍餉移獎子弟八月復署四川總督九月授陝甘總督七年果落克賊番在嘉峪關外劫掠復插帳索賴地方樂斌飭官兵剿辦賊踞雪山抗拒官軍由閒道繞賊後夾攻賊平得旨嘉獎八年三月因甘省綠營停募兵丁糧缺過多奏言甘肅地值邊陲幅員遼闊額設綠營兵制甲於他省至咸豐四年前任總督易棠因外省協甘兵餉欠解過多無可籌墊奏請將各路咨回甘省糧缺暫停募補並將軍營撤回歸伍兵丁抵派操防本營所出糧缺亦暫停募在易棠所議原爲稍減兵額卽可以少發餉銀固屬權宜之計第當日並未議及應行停補數目見經飭查各營停募糧缺已積至四千餘名實存營兵止有二萬六千三百餘名設有差遣無從調派所關非小擬請將見在各營未補糧缺斟酌地方情形量爲攤派共停補一千二百分以省餉需下餘糧缺卽行照數募補疏入下部議行十年六月入覲九月署陝西巡撫譚廷襄奏請將陝西各鎮兼歸巡撫節制諭令樂斌抵陝與譚廷襄妥爲商略尋覆奏擬照河南山西巡撫之例請旨將該撫賞加提督銜遇有征剿防堵要務陝西各鎮協官兵由該撫行文酌

調仍咨總督查照下部議行旋復捐助軍餉移獎子弟時津沽一帶海疆不靖諭樂斌帶兵來京尋事平回任初撒拉回民馬朵三糾黨滋事十一年正月三月間復糾黨擾及西寧碾伯等縣九月樂斌以匪衆悔罪投誠首犯伏誅邊圉肅清入告並請獎出力文武員弁允之十二月復請入覲諭曰甘肅爲西陲重地該督身任兼圻應如何力圖報稱茲乃仍以叩謁等詞瀆請並歷述寵遇語多鄙瑣不知大體至於此極著傳旨申飭初以樂斌辦理撤回經前任都察院右副都御史張芾御史陳廷經裘德俊等先後奏參上命兵部尙書麟魁戶部尙書沈兆霖前往查辦同治元年正月麟魁等奏稱樂斌辦理撤回實有縱匪殃民情事復諭將樂斌被參納賄營私各款澈底根究二月沈兆霖奏查明撤回滋事大員不能實力剿辦捏稱悔罪投誠奏結請獎致該回仍肆侵掠其被參納賄營私各款查無實據惟失察侍妾與屬員之妻往來復以候選知縣爲幕友屢爲保奏並於家人等盤踞把持不能覺察以致聲名狼籍疏入上以樂斌昏庸乖謬有心欺飾著卽革職並發往新疆效力贖罪八月到戍三年以報效鉅款經伊犁將軍常清奏請釋回並稱其當差奮勉未便沒其微勞上不允四年伊犁被圍常清會同新任將軍

明緒奏言樂斌籌餉籌兵不遺餘力復請釋回諭曰革員樂斌既在伊犁尙能出力著加恩准其釋回仍著留於伊犁幫同辦理一切兵餉事宜但能始終出力並准明緒酌量保奏光緒元年故

李宗羲

李宗羲四川開縣人道光二十七年進士以知縣卽用分安徽三十年四月署英山縣知縣八月補婺源縣知縣十二月調太平縣知縣咸豐三年廣西賊洪秀全率黨陷安慶旋踞江寧宗羲奉調隨軍協理糧餉旋赴廬州大營兼管軍裝製造五年官軍解柘皋圍保陞同知十月克廬州府賞戴花翎七年以剿辦來安棚匪出力晉知府八年侍郎曾國藩以楚軍進規安徽潛太舒桐調充營務處九年署安慶府知府以疾去官同治元年河南巡撫嚴樹森疏薦宗羲孝行純篤歷著循猷得旨敕部調取引見未至而樹森調撫湖北又疏調宗羲得旨交嚴樹森差遣委用三年兩江總督曾國藩檄赴江南管江北釐金總局嚴剔諸弊裁定沿江釐捐科則十一月曾國藩續保克復江寧籌餉各員宗羲以道員歸兩江補用四年又以宗羲嚴正明愼能持大體特保之旋署兩淮鹽運使三月陞安徽按察使曾

國藩奏請暫留鹽運使任允之八月擢江寧布政使五年清水潭決湮高郵等七州縣宗義設法籌款工賑並行又詳定招墾荒田酌緩升科限制章程及江寧七屬民衛丁漕酌定折徵等次分上下兩忙徵收八年四月入覲五月授山西巡撫尋諭曰晉省沿河要隘近接陝疆甘回未平河防仍須籌辦務臻嚴密該省吏治民生及籌防籌餉各事宜務當斟酌盡善宗義奏言山西急務首在河防見督同署按察使李慶翱等分段駐守並查看河堡情形請添募勇丁交提督宋慶就近節制允之旋劾布政使胡大任廢弛因循命勒令休致十一月陝回乘河冰來犯宗義檄各營堵擊三戰皆捷自是賊數由延川韓城竄出均擊卻之九年七月丁繼母憂十一年服闋十二年正月授兩江總督敕卽馳赴新任並辦理通商事務宗義疏辭上優詔褒勉時日本尋釁宗義購備軍火築烏龍山礮臺十有六江陰十有五都天廟六象山十有一焦山八下關四又建吳淞口礮臺江陰北岸瀏聞沙烏龍山北岸沙洲圩一律添築成犄角之勢九月宗義疏陳外侮內患天時人事皆有可慮請省營繕減服御不以爲汙奐優游之日而以爲臥薪嘗膽之時十三年五月疏言星變屢見外患方熾上年御史沈淮奏請停止園工臣亦冒貢愚